

八瓊室金石補正

第六十冊



八寶堂金石補正

卷一

八瓊室金石補正卷一百二十七

太倉陸增祥撰

男 繼輝校錄

吳興劉承幹覆校

金五

重修蜀先主廟碑

高八尺八寸廣三尺八寸廿一行行五十字字徑一寸二分行書篆額題重修蜀先主廟之記八字在涿

州樓

桑村

重修蜀先主廟碑

儒林郎前鄭州防禦判官提舉學校常平倉事武騎

尉賜緋魚袋王庭筠書篆

仁者未必成功成功者未必仁仁者之心以仁、天下
不仁者之心以仁濟其私故善論人者論其心之何如
而成敗不與以仁濟其□者發于其言見于其事亦仁
也蓋竊仁以欺天下夫竊仁者是有大不仁根著于心
然竊者易窮也而根著于心者卒不可掩天下之人莫
不腹詈臆唾雖一時成功旋與草木共腐矣仁者之心
不以其身其家而以天下故天下之人亦相與謳歌戴
仰頽以爲吾君雖生無成功天下之人莫不歎惜至後
世猶喜稱道精爽在天能推其仁心用之不已施之不
竭呼吸而兩雲咄嗟而風霆只尺萬里朝夕千載此理

之自然無足恠者先主仁人也當陽之役不以身而以民永安之命不以家而以賢雖不能如其言要之其心如是而已有厚愛天下之心必饗天下之報至今天下之人猶嘆惜其無成而喜稱道之涿之人又祠而奉之宜哉涿先主之故家也廟距州西南十里而遠庭有石乃刺史婁居迺重修記唐乾寧四年也則血食于此舊矣歲久屋老纔庇風雨承安二年夏四月里民始議增葺于是富者以資巧者以藝少者走以服其勞老者坐以董其功稍完治中堂新作門屏又作兩廡配祀元臣諸葛孔明關雲長法孝直在東廡土元張益德簡憲和

在西既成具興廢歲月之文于庭筠將以刻諸石庭筠曰五季兵火之餘室廬焚蕩殆盡而廟兒踴然獨存悍夫暴客過堂下歛兵肅跽不敢犯則其仁之入民也深矣大哉仁乎蘊之于心充于天地被于万物蓋有□與死而俱亡者幽而爲神其遺澤殘烈句及天下後立以達其生平未厭之心必矣豈獨私于一鄉哉祠而奉之者特其鄉人之情耳庭筠旣書其事復作歌遺之使迎送神佐其鼓舞以樂之云先王建安廿六年卽皇帝位後謚曰昭烈若夫虛名末飾非其心也唐石題曰蜀主廟今仍之其辭曰舜禹不可作兮古猷日潰盜恥盜守

兮恓不爲恠仁人起兮力砭其廢志天下兮豈獨爲漢
計大統未一兮時已逝奄爲神明兮陟配上帝何紓我
憂兮仁及異世彼操丕兮死爲妖彗握長鋏兮載芟載
剝燕山之隅兮范水之裔平疇如砥兮惟神之豐沛鬱
童々兮羽葆蓋悵籬樹兮今安在記兒時之舊事兮想
亦爲之一愴神之去來兮蒼虬翠馱粲華裾兮鏘鳴玉
佩絙瑟而吹簫兮紛群音之繁會牲肥酒香兮神其飫
醉來雲度帟兮回風滿旆將而送兮百拜民不忘兮遺
愛駟螭蝗兮癘疫時雨暘兮屢歲俾富康兮耆艾民德
神兮事之無替

承安四年四月望

登仕郎范陽縣主簿兼管句常平倉事劉大有

忠武校尉范陽縣令兼管句常平倉事武騎尉張

繹

昭武大將軍行涿州刺史兼知軍事提點 山陵提

舉常平倉事上輕車都尉彭城郡開國伯食邑七伯

戶蒲察克溫立石

京畿金石考載唐乾甯四年蜀先主廟碑云見金

石文字記撰人姓郭無名訪碑錄載乾符四年蜀

主廟記鄭筠撰書筠清館載婁居延重修蜀主廟

記郭筠撰書文云歲次丁酉則是乾符四年非乾甯也然此碑所敘明云乾甯四年疑孫氏吳氏所載有誤矣据此碑則重修者爲婁居迺金石文字記作婁居道筠清館作婁居延又復歧異未得拓本附記於此

懷州靜應廟額牒

高二尺廣四尺共十六行字
數字體大小均不一在河內

尙書省牒懷州靜應廟

禮部狀承都省付下懷州奏知河內縣事陳崇狀有

上清紫虛元君南嶽魏夫人廟祈雨應驗乞賜顏額
尋下太常寺看詳據本寺狀本寺令節文諸神祠應
旌封者先賜額合取自朝廷指揮

牒奉

勅宜賜靜應廟爲額牒至准

勅故牒

崇寧三年五月十五日牒

左光祿大夫守右丞吳押

司空兼左僕射押

李□刊

本廟功德主郭□□

大金承安四年己未歲五月晦紫陵故醫生王師□
男澂澤濟上石

右懷州靜應廟額牒在河內牒賜于宋石刻于金
承安四年當宋慶元五年詎賜牒時九十五年矣
左光祿大夫守右丞吳者吳居厚也司空兼左僕
射者當是蔡京也

重立鄧太尉祠碑

高四尺八寸二分廣二尺四寸六分共廿四行記文
行五十餘字不一字徑七分正書篆額題魏太尉鄧
公碑六字
在蒲城

夫自古立功立言之臣非徒有益於當時抑其遺

芬餘

烈足以播於無窮傳於萬世而爲不朽之計代有人焉

尙慮功立而主不知

事

成而上不察吞聲飲恨爲天下

之所惜□勝歎哉□命將之諱曰自閩以外將軍制之

言得專其事也及其伐叛取國務在鎮安百姓以收其

心而反拘以

常

憲事須當報不宜輒行

則

遂抵

淪

敗吾

於太尉鄧侯見其人矣太尉諱艾字士載義陽棘陽人

也始以見知於司□□王辟之爲椽稍遷尙書郎□參

征西將軍事遷南安太守賜爵關內侯加討寇將軍後

遷城陽太守再遷汝南太守兗州刺史加振威將軍高

貴鄉公卽尊位進位□城亭

侯行

□□將軍甘露元年

詔以爲鎮西將軍都督隴右諸軍事進封鄧侯分□□
戶封其子忠爲亭侯二年遷征西將軍前後增邑凡六
千六百戶其詔曰曜威奮武深入虜庭謂禽劉禪也斬
將搴旗梟其鯨鯢爲破文欽也使僭號之主係頸謂禪
率太子諸王及羣臣面縛詣軍門也歷年逋誅一朝而
平謂巴蜀四十餘年限於一方也兵不踰時戰不終日
雲徹席卷蕩定巴蜀謂旬日之間□平定也其勲業之
美功德之隆可謂冠一時矣無何姦臣鍾會構成禍基
使太尉羅其凶害子孫遷徙天下痛心晉室爰興泰始

三年議郎段灼知太尉死非其罪乃上疏理之曰公心懷至忠而荷反逆之名平定巴蜀而受夷滅之誅臣竊悼之賴朝廷清明遂從其請得從吳人傷子胥故事收葬立祠以旌節義距蒲城東北五十餘里洛水西渼陂貌斯在有碑銳上而竅文多漫滅首云魏故太尉鄧公祠碑其陽云大秦建元三年鄭能邈謂太尉祠張馮翊所造歲久頽折因舊增飾則知祠宇所建其來久矣環祠數十家皆鄧氏豈其子孫遷徙於西城者耶抑立祠後使其家護守洒埽者耶或因其墟聚故地苗裔尙多而爲之耶世代綿遠弗可詳考唯魏碑屹立斯爲

可據信不誣矣僕往來祠下屢矣近歲宦學長安久不

來此故人韓沖走書抵僕曰鄧氏諸公欲再立祠碑貞

石已具而其文尙闕子如惠顧前好能杖策一來乎僕

承命欣然因而言曰昔太尉以忠死而議郎段灼理之

遂得收葬立祠□千載之下碑石欲朽而復命僕使新

其文則是段氏終始有功於太尉矣豈可緘默而不言

乎乃作迎神送神之詞使其子弟歲時歌舞之使行路

之人見之知鄧侯之勲業厯千百世而不忘其子孫雖

永永而不替也其詞曰

侯之來兮風颼颼

載靈輿兮羽旗

彷彿如

亨兮堂宇上

不聞聲兮簫鼓悲

侯之去兮去

何劇

風爲施兮雨爲□

秋之深兮春之暮

不可見兮水東注

大金承安四年十月重建

鄉貢進士段繼昌

記

昌黎韓沖書丹

權

周刊石

裔孫進義校尉鄧永

鄧淳

鄧祐

鄧珪

鄧弁

鄧□

鄧景

鄧昂

鄧□

鄧□

進義校尉

鄧□

鄧直

鄧廣

鄧昌

鄧安

鄧□

鄧□

鄧俊

□威

□簡

鄧昶

右重立鄧太尉祠碑在蒲城未見箸錄甲戌夏自
長沙購得之記敘鄧艾厯官本於三國志魏書司
下王上是馬宣參上是出城上是方將軍上是安
西戶上是五百碑所缺字皆可据傳補之詔辭亦
載艾傳段灼晉書有傳字休然敦煌人世爲西土
著姓嘗爲鄧艾鎮西司馬破蜀封關內侯累遷議
郎武帝卽位上疏追理艾冤疏文具載傳中魏書
亦載之其稱鄭能邈所立爲魏碑殊誤抑用爲巍
字耶

重刊鄭司農碑陰記